

JAMHURI YA MUUNGANO WA TANZANIA KURUGENZI YA MAWASILIANO YA RAIS, IKULU



Dar es Salaam
30 Julai, 2026

Barua pepe: press@ikulu.go.tz

TAARIFA KWA UMMA

RAIS SAMIA ATHIBITISHA NIA YA MARIDHIANO KUELEKEA MCHAKATO WA MABORESHO YA KATIBA

Rais wa Jamhuri ya Muungano wa Tanzania, Mheshimiwa Dkt. Samia Suluhu Hassan, amesema Serikali itaendeleza maridhiano ya kisiasa kuelekea hatua za maboresho ya Katiba kwa kuzingatia sheria na taratibu za nchi.

Rais Dkt. Samia ameyasema hayo leo tarehe 30 Julai, 2026, alipokutana na viongozi wa vyama 18 vya siasa nchini, Ikulu jijini Dar es Salaam.

Mazungumzo hayo yalihusu maridhiano, mageuzi ya kisiasa, uchumi, huduma za jamii, ajira, uwekezaji na ulinzi wa amani ya nchi.

Akirejea hatua ya mchakato wa maridhiano visiwani Zanzibar, Rais Dkt. Samia aliwaeleza viongozi hao hatua zilizofikiwa za maandalizi ya mchakato wa maridhiano kuelekea hatua zinazofuata za mapitio ya Katiba.

Alisisitiza kuwa hatua zote za mchakato huo zitafanyika kwa kuzingatia sheria, kanuni, na taratibu zilizowekwa, kwa maslahi mapana ya Taifa, na kwamba Serikali itaendelea kukutana na viongozi wa vyama vya siasa kwa mazungumzo katika kipindi cha angalau mara tatu kwa kila mwaka.

Mkutano huo, uliowaleta pamoja wenyeviti, makamu wenyeviti, makatibu wakuu na viongozi wa jumuiya za vyama vya siasa nchini, ni wa pili wa aina hiyo kuitishwa na Rais Dkt. Samia tangu kufanyika kwa uchaguzi mkuu wa mwaka 2025.

Mkutano wa awali ulifanyika tarehe 31 Machi, 2026, Ikulu jijini Dar es Salaam, ukiwakutanisha wagombea wa nafasi ya Rais na wagombea wenza kutoka vyama vya siasa vilivyoshiriki uchaguzi mkuu wa mwaka 2025.



[Ikulu Mawasiliano / ikulu_mawasiliano /](#)
[ikulu_Tanzania / ikulu Tanzania /](#)
[ikulumawasiliano / Ikulu Tanzania / Ikulu Tanzania](#)



Akizungumzia taswira ya uchumi wa nchi, Rais Dkt. Samia alisema uchumi wa nchi umeendelea kukua kwa **asilimia sita** katika mwaka uliopita, huku ukuaji wa **asilimia 6.3** ukitarajiwa mwaka huu.

Alisema Serikali imeweka msisitizo katika kukamilisha miradi ya maendeleo iliyokwishaanza kutekelezwa, pamoja na kuendeleza uwekezaji katika miundombinu ya kinkakati ikiwemo reli, barabara, bandari na miundombinu mingine.

Katika uwekezaji, Rais Dkt. Samia alisema maboresho yaliyofanywa katika Bandari ya Dar es Salaam yameongeza uwezo wa bandari hiyo kuhudumia biashara ya ndani na kikanda, na kubainisha kuwa Serikali inaendelea na upanuzi wa shughuli katika bandari za Bahari ya Hindi, Ziwa Victoria, Tanganyika na Nyasa.

Halikadhalika, Rais Dkt. Samia amevitaka vyama vya siasa nchini kulinda amani, uhuru na maslahi ya nchi, akisisitiza kuwa ulinzi wa Tanzania ni wajibu wa pamoja baina ya Serikali, vyama vya siasa na wananchi wote.

Katika hatua nyingine, viongozi hao waliwasilisha maoni yao kuhusu masuala mbalimbali ya maendeleo na ustawi wa wananchi katika nyanja za siasa, maendeleo ya jamii na uchumi. Serikali iliahidi kuendelea kuyapokea na kuyafanyia kazi mapendekezo hayo kupitia majukwaa stahiki ya majadiliano na mifumo rasmi ya maamuzi.



Bakari S. Machumu

Mkurugenzi wa Mawasiliano ya Rais, Ikulu